

Izjava visokog predstavnika i posebnog predstavnika EU, Miroslava Lajčáka



Pred Bosnom i Hercegovinom se nalazi dug put i mnogo napornoga rada i kompromisa, ali danas, svi mi: građani BiH, politički lideri i međunarodna zajednica, možemo sebi dozvoliti trenutak za čestitanje.

Iako su pred nama mnogi izazovi, nikada ne smijemo zaboraviti koliko smo odmakli u ovih trinaest godina od kada je zemlja razorena godinama krvavog rata koji je podijelio zajednice u BiH. Za ove pomake zaslužni su ljudi iz Bosne i Hercegovine.

Politički lideri su pokazali da mogu naći zajednički jezik koji je potreban da se ova zemlja dovede na put članstva u EU – puta sa kojeg, nakon što se uputila njime, niti jedna zemlja nije skrenula.

Ovo je trenutak zadovoljstva i radosti za sve zemlje koje su uložile ogromna sredstva u izgradnju BiH. Zadovoljni mogu biti i svi oni koji su napustili svoje zemlje kako bi došli da rade za Bosnu i Hercegovinu.

Uspjeh koji obilježavamo danas je uspjeh Bosne i Hercegovine, kao što su i izazovi koji predstoje izazovi za Bosnu i Hercegovinu.

Sa svoje strane, Europska unija je danas još jednom potvrdila svoju privrženost Bosni i Hercegovini. Potvrdila je svoju

namjeru da pomogne Bosni i Hercegovini da uspješno realizira cilj priključenja Europskoj uniji, što je garancija da se zemlja nikad više neće vratiti krvavim sukobima.

Upravo je namjera da se onemoguće budući konflikti bila glavni poticaj za stvaranje EU prije pedeset godina, a danas je ta ista ideja objašnjenje zašto je potpora Europskoj uniji u Bosni i Hercegovini tako ogromna i stalno jača: posljednje ankete pokazuju da je potpora za ulazak u Europsku uniju dosegla 85%. Ova potpora je i rezultat naše kampanje o EU, tijekom koje sam posjetio 16 gradova širom BiH i razgovarao sa hiljadama građana o integraciji BiH u Europsku uniju.

Europska unija je ohrabrena ovakvom potporom, dok lideri u Bosni i Hercegovini sad ne smiju iznevjeriti ovako velika očekivanja građana.

Kada sporazum za dva tjedna stupi na snagu, politički lideri Bosne i Hercegovine i njene institucije moraju biti spremni – a mi, iz EU, smo i dalje tu da pomognemo.